



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tiryimym@aolima tir yimym TAPAK 8

Taraketa alirtemi BJP anema longjemogo: Shivraj Singh Chouhan

Abu Metha-i Athletics Federation of India ketdangsürtem ajuru

VOL. XX NO. 279 (ADOK 279) DIMAPUR KÜPTOKNÜ (SATURDAY) CHITENI (JULY) 22, 2023 ₹ 5.00

NBSE-i Compartmental & Improvement Examination results metetdaksüogo

Dimapur, July 21, 2023 (TYO): Nagaland Board of School Education (NBSE)-i HSLC & HSSLC Compartmental & Improvement Examination 2022 indang provisional results metetdaksüogo.

HSLC Compartmental Examination 2023 ya June 22 nungi 28, 2023 tashi agia liasü aser kaketshir 1510 nungi parnok 658-i takok nguogo.

HSSLC Compartmental Examination 2023 atema Arts Stream nung candidates 640 liasü. Iba nungi candidates 364-i takok ngua pass percentage 56.88% ngutet.

Commerce Stream nunga candidates 88-i tatidang agütsüba nungi parnok 55-i takok ngua pass percentage 62.50% nguogo. Tatemsa Science Stream nung candidates 223-i tatidang agütsüba nungi parnok 78-i takok ngua pass percentage

34.98% nguogo.

Maneni, HSLC Improvement Examination 2023 nung candidates 30 nungi parnok 27-i takok angu.

HSSLC Improvement Examination 2023 nunga Arts stream nung kaketshir 1-i tatidang agütsüba takok angu aser Science stream nung kaketshir 35 nungi parnok 18-i takok angu.

NBSE-i taküm mezüing atema HSSLC candidates asoshi Compartmental Examination agiogo. Maneni, HSLC aser HSSLC candidates atema Improvement Examination ya taküm mezüing agia liasü.

Centre Superintendents, Teachers, District Administration, Police aser Medical personnel teyari ajanga HSLC & HSSLC Compartmental aser Improvement Examinations 2023 takok ngua agiogo ta NBSE-i metetdaksü.

Telok balalai May 4, 2023 tatalokba aitsür

Dimapur, July 21, 2023 (TYO): Nagaland nung telok balalai May 4, 2023 nü Manipur nung Meitei nungeri Kuki-Zo tsür ana yimjak nung mangsa anir senzüba aser tashiyim agi shi nung medemba khukhua aitsüba metetdaksüogo.

Nagaland Tribes Council (NTC), Naga Hoho, Central Nagaland Women Association (CNWA), NDPP Women Organisation Media Wing, Leader of NPF Legislature Party Kuzholuzo (Azo) Nienu aser Nagaland Pradesh Congress Committee (NPCC) President S. Supongmeren Jamir nungeri

sangdong balala nung iba tatalokba aitsüba den temeten meshiba shia lir.

NTC indang sangdong nungbo July 15, 2023 nü Maring Naga tsür Mrs. M. Lucy tepsetba dena aitsüba shia lir. Parnoki Manipur sorkar dang item mapa tamajung inyakertem ajak aputsü aser ozüing tesashitiba agi merenshitsu takhangba agütsüogo.

Naga Hoho-ia mapa tamajung inyakertem, Meira Paibi tem, lennirtem aser civil society organizations züingsemtem ajak aputsü takhangba agütsüogo.

ILPya non-indigenous inhabitants ajak atema lir

Kohima, July 21 (TYO): Non-indigenous inhabitants ajak ket nung Inner Line Permit (ILP) alitsüla aser parnoki Bengal Eastern Frontier Regulation (BEFR) Act 1873 kübok iba permit meshitsüla, ta Kohima Deputy Commissioner Shanavas C, IAS-i metetdaksüogo.

Iba ozüing ya Naga Hills (tang aliba Nagaland) nung 1873 küm nungi amshia arur.

BEFR Act kübok Nagaland nung indigenous inhabitant masür ajungai ILP meshitsüla aser state sorkari renema aliba ama state telungi mapang tatakzük atema dang aittsüla ta Kohima DC-i sangdong ka nung ashi.

Iba tetuyuba sülen manidakertem merenshitsu ta paisa ashi.

May ita Kohima aser temeket nung anogo ka ILP verification

aoba mapang aibelener nisung 325 jangjateta liasü.

Iba mapang Kohima district administration aser Nagaland Police nungi telok pungui 'illegal immigrants' aser ILP nung aibelenerntem bushia jaja liasü.

Iba verification mapang ILP kar mapang süiadoker aliba aser kar tejangja passes maliba putet. Anungji BEFR Act 1873 indang Section (2), (3) aser (4) agi melaba ama temerenshi agüja liasü.

Iba mapang aibelener dang senchi achiba sen lakh 1.2 bendentet aser iba sen sorkar senpongi iogo.

Kohima district nung illegal immigrants aser ILP nung aibelener putettsü asoshi Special Task Force ka tenteta lir aser parnoki mapang shia ILP verification aotsü ta Kohima DC-isa sangdong nung ashi.

NSF-i HSLC & HSSLC exam 2023 nung Naga toppers tushiogo



Kohima, July 21, 2023 (TYO): High School Leaving Certificate (HSLC) aser Higher Secondary School Leaving Certificate (HSSLC) Examinations 2023 nung Naga toppers nem tenüingsang agütsüba sentong ka Naga Students' Federation (NSF)-i ayonga agiogo.

Iba sentong nung HSLC nungi kaketshir 66 aser HSSLC nungi kaketshir 33 den Council of Higher Secondary Education (COHSEM) nungi kaketshir 2 densema kaketshir 101 nem tenüingsang agütsü.

Capital Convention Centre nung agiba sentong nung tetushi tejaoker ka ama PHED & Cooperation Minister Jacob Zhimomi-i o jembidang takok tajung angurtemi iba yagi teperi ta mebilemi maneni merangtsü tayongzükba agütsü.

"Nisung ka taküm nung kaketshir mapang ya kanga dang tongtipang lir anungji adianu mesüra medemertemi ashiba

mangai pei dak kechi teinyaktettsü lir ibaji meteta tajungba akümtsü merangtsüla" ta Jacob Zhimomi-isa ayongzük.

"Nagaland nung mapa manguba khuret ulura kümogo aser yaküm tashi nung zünger mapa manguba lanur 90,000 tema liasü. Iba ya state sorkar atema tebilemtsü khuret tulu ka kümogo aser tazüingertem nem pei tetemjen mapa agütsütsü meranger" ta paisa ashi.

"Nenoki nendaka aser akangakanga alizüing atongtsü merangtsüla. Nenoki angazükba shisatsüji loktiliba atema amshitsüla" ta Minister Jacob-isa ashi. Naga nunger tekolok agibo tangar meneper saka industry maliba ajanga rongsenketzüing tsütsü tangar memeneper, ta paisa shisem.

Jacob-isa tsüraburtem aser guardians dang lalushibonga masü saka tanurtemi nüingdakbatem peritsütsü tayongzükba agütsü.

NSF president, Kegwayhun Tep-i takok tajung angur kaketshir ajak dang pelaba ashi.

"Nenok ya tetsükdaksü masü saka nüingdakba ka akümtsüla aser state services examinations o mapa dang masü saka tuluba bushitsüla" ta Tep-i ayongzük.

HSLC exam nung sorkar school tem pass percentage 49.3% atema süoki ia bilema paisa sorkar tesayurtem dang tali tenendakba nung aser bendanga agütsüshir inyaksü ayongzük.

Iba sentong nung UPSC 2023 (Rank 387) Vevotolu Kezo-i lai takok anguba osang lemsatet aser toppers tenüing nung HSLC 2023 Top 9 Arolü Pheasao-i o jembi.

Sentong nung NSF vice president Atokiho Sumi menden liasü, Lotha Baptist Church, Kohima Pastor Mhonchumo Lotha-i temoatsü meshia sarasadem aser NSF secretary education Medovi Rhi-i anküp tepela o jembi.

Nagaland nung NCP MLA ajaki Ajit Pawar pusemer

New Delhi, July 21, 2023 (Agencies): Nagaland nung of Nationalist Congress Party (NCP) MLA tenetprongi Maharashtra Deputy Chief Minister Ajit Pawar-i aniba NCP pusemba metetdaksüogo.

Nationalist Congress Party (NCP) Nagaland unit president Vanthungo Odyuo-i Delhi nung NCP working president Praful Patel aser NCP Maharashtra unit president Sunil Tatkare na den ajurutepdang Ajit Pawar-i aniba telok pusemba metetdaksü.

Odyuo-i Patel nem Nagaland nungi NCP MLA 7-i Ajit Pawar pusema züluba shiditem agütsü.

Tan ita tetenzüklen Ajit Pawar-i anir NCP MLA 8-i Maharashtra Shiv Sena aser BJP teloktep sorkar nung aden.

Parnoki Chief Minister Eknath Shinde-i aniba sorkar nung adenba ajanga Sharad Pawar-i tentetba NCP lemdang.

Ajit Pawar-i pai aniba telok ya "chichiba NCP" ta ashir aser pai lennir tejentem- Praful Patel, Chhagan Bhujbal aser Dilip Walse

Patil nunger teyari nguogo.

Ajisüaka Sharad Pawar-i pai aniba telok ang "chichiba NCP" ta ashir aser lennir tejen aika party anema inyakba atema tenüing züingdokogo.

Ajit-i aniba telok nung MLA 33 lir ta parnoki ashir aser külen Sharad Pawar-i aniba telokia parnok pusemer MLA 20 lir ta metetdaksüogo.

Ajit Pawar-isa Election Commission of India dangi NCP tenüing aser 'alarm clock' symbol meshia shidi zülüogo.

Manipur nung tetsürtem mesenmetua amshiba aitsür: NESO

Dimapur, July 21, 2023 (TYO): Manipur nung nisung telok kati tetsür ana tashiyim agi mangsa kümdaksür anir senzüba aitsür aser shia meteter aliba loktiliba ka nung ibala tesempatsü mapa magizüker ta North East Students' Organisation (NESO)-i metetdaksü.

"Mepetmesü mesüra rara ajak nung tetsürtem aser tanurtemi timtem kanga ajurur aser parnok dak mapa tamajung inyaker. Iba ama mapa inyakertem nem tatok magütsütsüla aser nisung ajaki

aitsütsüla" ta NESO-i sangdong ka nung ashi.

"Tawa video ka prokshiba nung Manipur nung Vaiphei tsür ana tashiyim agi süoshi semzükdaksür yimjak nung mangsa anir senzüba angudang kanga aoksar aser temulung raksar" ta NESO-isa ashi.

Iba mapa inyaker ajak aputsüla aser ozüing tesashitiba agi merenshitsu ta parnokisa takhangba agütsü.

Manipur nung aser North East nung aliba lisopur ajak dang NESO-i yimjung nung alitsü aser

putu aika tesentaktep tajung yanglua aruba akangshiteptsü maneni ayongzükter ta parnokisa metetdaksüogo.

North East Students' Organisation (NESO) nung All Assam Students' Union (AASU), All Arunachal Pradesh Students' Union (AAPSU), All Manipur Students' Union (AMSU), Garo Students' Union (GSU), Khasi Students' Union (KSU), Mizo Zirlal Pawl (MZIP), Naga Students' Federation (NSF) aser Twipra Students' Federation (TSF) dena lir.

Nagaland Governor La. Ganesan-i Peren semdang

Dimapur, Chiteni/July 21 (TYO): Nagaland Governor La. Ganesan-i July 21, 2023 nü Peren semdanga Deputy Commissioner, Peren indang Conference Hall nung Peren district kübok Heads of Government Offices aser Civil Society Organizations tem den senden mena liasü.

Iba senden nung jembidang pai district nung education, healthcare, lenmang aser banking facility densema tongtipang infrastructure agütsütsü tongtipang, ta ashi.

Pai state nung aliba school aser college ajunga dang New Education Policy amshitsü ayongzük, koba ajanga India indang shisaliok aliba den menepa aotsü, ta ashi.

Governor-i health dak sendakba scheme balala, talisa Ayushman Bharat, Pradhan Mantri Bima Yojana, Pradhan Mantri Suraksha Bima Yojana, aser state meyong Chief Minister's Health Insurance Scheme indang lemsatapa liasü. Pai department balala dang item scheme ya nüburtem ajangzüksüsa amshitsü ayongzüka liasü.

Healthcare dak sendakba nung pai tuberculosis atema awareness agütsütsü aser Pradhan Mantri TB Mukh Bharat Abhiyan kübok TB treatment agütsü asoshi awareness tali agütsütsü

Public Accounts Committee ajanga NHAK semdang

Dimapur, Chiteni/July 21 (TYO): Public Accounts Committee ajanga July 21, 2023 nü Naga Hospital Authority Kohima (NHAK) semdanga liasü.

Advisor, Agriculture, Mhathung Yanthan-i anir PAC team yagi NHAK nung takum kumzüksüla hadir, Ultra Sonogram, Computerized EG machines, Cardiac Monitor, Ventilators, Photo Therapy Units, ENT Equipment amala osettsüset aliba asadanga liasü.

Parnoki iba tesem semdangba mapang, DH Kohima nung Blood Separation Unit atema hadir 27 asoshi sen lakh 72.78 agütsüogo ta temai adok. Ajisüaka hadir majungba ajanga Blood Separation Unit ya mapa meinyaker.

PAC ajanga Blood Bank indang jenjang asadanga aser hadir ajunga mapa inyak-meinyak repringa liasü. Parnoki NHAK nung Tele ICU Hub semdang, koba danga district tem den tele-connected lir, aser COVID-19 mapang melenba 10-bedded ICU wards semdanga liasü.

DoSE ajanga Nodal Officers shim

Dimapur, Chiteni/July 21 (TYO): Nodal Officers ama inyaksü District Education Officers ajunga shimba osang ka Directorate of School Education ajanga metetakja liasü.

nüngdaker, ta pai ashi.

Paisa Jal Jeevan Mission (JJM) kübok kilen ajak nem tajemtsü tzu temürek agütsütsü tongtipang ta nenshia ashi aser Public Health Engineering Department (PHED) dang nübur ajunga iba scheme nung ajangzükdaksütsü ayongzüka liasü.

Pai tontipang service tem rongnung banking ya ka lir, ta ashi aser senso ajak, talisa tetsürtem Jan-Dhan account lapoktsü ayongzük. Pai District Lead Bank Authority dang yimtsüngtem nung financial literacy camp tem ayongzüka nüburtem nem bank nungi teyari balala agütsüba indang angatetdaksütsü ayongzüka liasü.

Temesepba mozü tebilemstü lemsatapa mapang Governor-i civil society aser ozüing amshirtem dang temesepba mozü ayoker aser amshir nem tapet temerenshi agütsütsü ayongzük.

Pai nüburtem dang ozüing sülen anidaksü aser ano center aser state nung sorkar den amalitep akatsü ajungshia liasü.

Iba senden nung EE PWD (R&B), Dr. Khuito Murumi-i district nung lenmang yangluba project tem indang tongmelang agi osang agütsü, DIO Peren, Dr. Kiholi ajanga TB Elimination Programme indang osang agüja liasü.

NHAK ketdangsür temi Advisor Mhathung Yanthan dang mozüki ketdangsüba nung timtem balala ajuruba indang rasaa ashi. Parnoki tebilemstü balala benokba rongnung tongtipangtibaji gari anena ayutsü tesem maliba indang liasü, aser iba atema multi-level parking facility ka nüngdaker, ta ashi.

Parnoki ki tejen aliba ano tanem-tanemi yanglushitsü atema jembia liasü aser power supply atema sub-station aser transformer balaka asüngdanga liasü.

Advisor Mhathung Yanthan-i mozüki saklokba atema ashi aser tang aliba facility nung temolung süa bilemba lemsatapa liasü. Mozüki tajungba kumdaksütsü asoshi ketdangsür temi shilem junga agiba atema pai tenüngsang agüja liasü.

Senotsü aser ali dak sendakba nung tayongzükba aliba indang pai angatetba lemsatapa aser ketdangsürtem dang parnoki khuret lemsatapatem sorkar dangi abentsü, ta ashi.

Sangdong ajanga ashiba agi, Nodal Officers temi tang nungi tenzüka Rights of Children with Disabilities (RPwD) Act, 2016, aser Rule 7 of RPwD Rules, 2017 nung mela alibatema mapa kuma inyaksü.

Dept. of Fisheries & AR ajanga Dzü-ü ayongnung angopuoktsü



Dimapur, Chiteni/July 21 (TYO): Department of Fisheries and Aquatic Resources (AR), Nagaland ajanga July 21, 2023 nü Dzü-ü ayongnung Pradhan Mantri Matsya Sampada Yojana (PMMSY) kübok River Ranching Programme agidang angotechanu lakh 2 dak tema puokja liasü.

Iba sentong nung tetushi tesemdang ama jembidang, Director, Fisheries and Aquatic Resources, Rongsennungba ajanga ayong aser ecosystem indang jembia aser alima nung takum aliba ajak nem ayong ajanga takum shiruru zünger mezüingmai nem tzu, chiyongtsü aser talitsü tesem agütsü aser nisung asoshia chiyongtsü, sen lenmang aser südoksünema kazütsü agütsü, ta ashi.

Nüburtemi miim, batteries aser generator amshia angot apuba asoshi sasa jembidang, tarutsü nunga tajangzük angutsüsa yimya tajungnung angot aputsü nüngdaker, ta pai ashi.

Tim masüba yimya nung angot apuba ajanga angot dak timtem agütsüba kisüing masü saka tzu-mopunga raksatsür aser ayongnung amshiba miim

ya nisung asoshi majung lir, ta pai ashi.

Iba atema pai yimtsüng balala nung ketdangsürtem dang angot aputsü asoshi yimya shidak amshitsü atema ozüing yanglua ayutsü aser angot aintsü atema angot aputsü aser maputsü ita lateta ayutsü ayongzüka liasü.

Meyi mapang, talisa June nungi August tashi angot apuba nokdangtsüka, kechiaser iba mapang parnok entzü rizüker aser aser angot apuba ajanga yangji timtem agütsür aser angot nütsüng ajemer, ta pai ashi.

Deputy Director Fisheries and AR, Dr. Rongsenkumzuk-i iba scheme indang osang tongmelang agi agüja liasü.

Department of Fisheries, Ministry of Fisheries, Animal Husbandry and Dairying ajanga PMMSY scheme ya inyaker, aser iba scheme ajanga India nung fisheries sector nung terenlok mapatem atema sen crore 20,050 shi indoktsü. Ibai State aser Union Territories ajak nung küm pongu atema 2020-21 nungi 2024-25 tashi alitsü, ta pai ashi.

PMMSY yagi 'fish production, productivity & quality, technology, post-harvest

infrastructure aser marketing' tsütsü mawajem alibatema awajemtsütsü, ta pai ashi.

Iba scheme yagi value chain tashi itdaksütsü, fisheries management framework tajungba amenoktsü aser angot metsürtem rongsenketzung nung tajangzük angutsü.

D. Khel indang Head GB, Keduoneituo Kire-i department dang iba ama mapa tajung inyakba atema pelaba lemsatapa aser nüburtem dang ayong wazüka ayutsü asoshi angatetdaksütsü, ta ashi.

Nüburtemi angot aputsü asoshi ozüing yanglua aliba sülen manidaker aser iba yongji takoksa tulu ajurur, ta Kezoma village council chairman Krikrosa Naki-i ashi aser department dang awareness tajungba agütsütsü ajungshia liasü.

Iba sentong nung Joint Director, Department of Fisheries and Aquatic Resources, Neitho Kuotsu menden liasü, koba Rüdi Resort nung agi aser Sakhabama village indang senior pastor M Kezo-i sarasadem aser D. Khel Kohima village indang GB Vinyü Yiese-i melepzüng o jembia liasü.

Tuli Sub-Division kübok office balala ketdangsürtem senden amen



Dimapur, Chiteni/July 21 (TYO): Tuli Sub-Division kübok Heads of Offices ajunga shisadokden senden ka R.K. School indang Conference Hall nung July 21, 2023 anüngdang 11:00 ako nungi tenzüka MLA & Advisor, Fisheries and Aquatic Resources, A. Pangjung Jamir aser BJP Mandal Tuli ketdangsürtem den mena liasü.

Iba senden nung ADC Tuli ajanga tarur ajak pela agizüka jembia aser pei sasa metetpelaba mapang agia liasü.

Iba senden nung ADC Tuli ajanga tarur ajak pela agizüka jembia aser pei sasa metetpelaba mapang agia liasü. Senden nung department

asert HoDs ajunga dang nübur tenzüker ama nüngdakerba mapang nüburtem tenzüksü ajungshia liasü.

Paisa ketdangsürtem dang yimdak yimtsüng nung nüburtem rongsenketzung terenlok dak sendakba nung yariteptsü ajungshia liasü.

Iba senden nung ADC Tuli ajanga tarur ajak pela agizüka jembia aser pei sasa metetpelaba mapang agia liasü. Senden nung department

ajunga nungi parnok inyaksangshia aser timtem ajurubatem lemsatapa liasü.

Senden tembanga SDO (C) Tuli ajanga melepzüng o jembia liasü. Iba senden nung HoDs tem den All Ward Union Tuli indang chairman, ATC Tzudikong indang vice chairman, Tuli aser Tzudikong nung ward ajunga nungi chairman tem, Tuli aser Tzudikong nungi Watsü Talen tir aser tongti zülur aser GB Union tir dena liasü.

PM Modi aser Sri Lanka Tir nati linük ana tesendaktep asadang



July 21, 2023 nü New Delhi nung Ato kilonser, Narendra Modi aser Sri Lanka Tir, Ranil Wickremesinghe na senden amentsü jakdang tangokba noksa nung angur.

New Delhi, Chiteni/July 21 (Agencies): Hokolbarnü Ato kilonser, Narendra Modi aser Sri Lanka Tir, Ranil Wickremesinghe nati lenla aika nung linük ana tesendaktep jenjang asadangogo, ta Foreign Secretary, Vinay Kwatra-i metetdaksü.

Kwatra-i, lenir anati linük ana tsünga partnership aser amalitepa inyakba ajanga tawa Sri Lanka nung tebilemstü onük aika koktetogo ta bangjem, ta metetdaksü.

Ato kilonser Modi-i jaokba nung ajemdaker Sri Lanka Tiri anogo ananü (July 20-21) India semdangogo.

Wickremesinghe-i India semdangba dak sendakba nung osangbenertem den jembidang Kwatra-i, "Lenir anati tarutsü nung linük ana tsünga connectivity aser rongsenketzüng tsütsü tesendaktep ano tajungba

akümtsü atema peipei mangdang lemsatop," ta metetdaksü. Kwatra-i, India aser Sri Lanka nati documents aika renemogo aser item documents ajanga rongsenketzüng tsütsü amalitepa inyaksü atema onük aika ayimjema lir, ta ashi.

Renewable energy atema-a Memorandum of Understanding (MoU) ka sign süogo, ta pai ashi. "Ato kilonser Narendra Modi-i tenzükba 'Neighbourhood First policy' kübok lenir anati renewable energy atema MoU ka sign süogo. Trincomali atema-a MoU ka sign süogo," ta ashi.

"Tanabuba MoU ji Trincomali atema lir. Tanü sign asüba MoU kübok linük anapronglai Trincomali ya industry energy atema regional tiyongtsü ka kümdaktsütsü asoshi telemtetba agiogo," ta pai metetdaksü.

Kwatra-i, Modi aser Sri

Lanka Tir nati India nungeri senotsü teyari agüja Sri Lanka unique digital identity project inyakba atema jembiba den külemi Sri Lanka nunger rongsenketzüng asentenshiba atema o lemtepa liasü, ta metetdaksü.

Lenir anatisa, linük ana tsünga shishilembaba aser investment tesendaktep tajungba akümba ajanga Sri Lanka nunger rongsenketzüng asentenshiba nung shilem agitsü, ta bangjem.

Tenatisa linük ana tsünga rongsenketzüng aser technology tsütsü amalitepa inyaksü atema tezüngzüktep agia aliba aser India nunger sen 'rupee' agi shishilembaba indang jembiba.

Brihostibarnü Sri Lanka Tir, Wickremesinghe Delhi tonga aruba mapang nung Union Minister of State (MoS) for External Affairs, V Muraleedharan-i pa agizüka liasü.

Centre-i Bill 31 benoktsü tebilemba lir

New Delhi, July 21 (Agencies): Tzüngluruwa mongpu Parliament tenzükogo, aser tan mongpu senden nung sorkari bill 31 benoktsü tebilemba lir, ta Parliamentary Affairs Minister, Prahlad Joshi-i metetdaksü.

Item bill rongnung Digital Personal Data Protection Bill, 2023 aser Government of the National Capital Territory of Delhi (Amendment) Ordinance, 2023 densema lir.

Bill tem rongnung Digital Personal Data Protection Bill, 2023 densema lir; tan ita tetenzüklen ang Union Cabinet-i iba bill agizüka liasü. Yaküm August ita nung Parliament nung sorkari Personal Data Protection Bill agiena liasü.

Tanga bill tem rongnung-DNA Technology (Use and Application) Regulation Bill, 2019; Mediation Bill, 2021; Biological Diversity

(Amendment) Bill, 2022; Multi-State Cooperative Societies (Amendment) Bill, 2022; Repealing and Amending Bill, 2022; Forest (Conservation) Amendment Bill, 2023; Constitution (Scheduled Tribes) Order (Third Amendment) Bill, 2022 (Himachal Pradesh); Constitution (Scheduled Tribes) Order (Fifth Amendment) Bill, 2022 (Chhattisgarh); Postal Services Bill, 2023; National Cooperative University Bill, 2023 aser Ancient Monuments & Archaeological Sites and Remains (Amendment) Bill, 2023 densema lir.

Sorkari item bill ajak agizüktsü merangtsü aser Opposition party temi Manipur tensa, railway safety, mapa manguba tebilemstü, osettsüset jenjang maneni atuba aser India-China arrtsü onüktem nung sorkar anema nokdaksü tebilemba lir.



Manipur nung rara aser tetsür ana mangsa anir senzüba tatalokbatem anema July 21, 2023 nü Bengaluru nung Aam Aadmi Party (AAP) züngsemtemi longkak aitba noksa nung angur.

TangLinük nung Muslim nunger crore 19 alitsüa akok: Lok Sabha

New Delhi, July 21 (Agencies): 2023 küm tashi nung linük nung Muslim nunger nütsüng crore 19.7 alitsü akok, ta sorkari Parliament nung metetdaksü.

Lok Sabha nung Trinamool Congress MP, Mala Roy-i asüngdangba langzüdang Minority affairs minister, Smriti Irani-i, 2011 Census nung linük nung nütsüng shilem 14.2 Muslim nunger liasü, aser ibaji asadangra 2023 küm nunga parnok nütsüng shilemji kasa asütsüa akok, ta ashi.

Laisa, Census 2011 nung Muslim nunger nütsüng crore

17.2 crore liasü, ta ashi. 2020 küm July ita nung Technical group report ka ajanga, 2023 küm tashi nung India nunger nütsüng crore 138.8 akümtsü, ta metetdakja liasü.

"Census 2011 nung Muslim nunger nütsüng shilem 14.2 liasü aser ibaji asadangra 2023 küm linük nung Muslim nunger nütsüng crore 19.7 lir," ta Irani-i ashi.

Minister-isa literacy rate, labour force, tajemtsü tzü, metsü-meshidak aser kiojen dak sendakba osangtem metetdaksü, ajisüaka

Pasmanda Muslim nunger nütsüng yongsük dak sendakba tasüngdangba ka atemabo telangzüba magütsü.

Roy-i, taküm May 30 tashi nung linük nung Muslim nunger nütsüng kwi aliar asadanger ma?, Pasmanda Muslim nunger nütsüng kwi ali? aser linük nung Pasmanda Muslim nunger loktiliba-rongsenketsüng dak sendakba data tejangja lir asü? ta asüngdanga liasü.

Irani-i, Muslim nunger arrshi küm 7 ser temapurtem literacy rate ji 77.7 lir aser Labour force participation rate ji 35.1 lir, ta metetdaksü.

Tarak keta alirtemi BJP anema longjemogo: Shivraj Singh Chouhan

New Delhi, July 21 (Agencies): Taruba Lok Sabha election nung BJP-i aniba NDA teloktep den tokteptsü atema opposition party 20 dak tema longjemba aija Hokolbarnü Madhya Pradesh Chief Minister, Shivraj Singh Chouhan-i, Ato kilonser, Narendra Modi pusemer aika aliba agi tarak keta aliba party temi BJP anema longjemogo, ta metetdaksü.

Chouhan-isa, opposition teloktep 'INDIA' (Indian National Developmental Inclusive Alliance)-i party 26 lenitsü atema lenir ka shimtetsü makoker, ta ashi.

Congress-i aniba INDIA teloktep tentetba aija Chouhan-i, "Tarak keta alirtem longjemogo aser parnok süngdong ka nung mener aikati Ato kilonser pusemba repranger. Ajisüaka kiyimsang (opposition teloktep) tang tashi telemtetba magi aser anükabang jashir. Tarutsü nung kechi ataloktsüar memetet," ta ashi.

Paisa, Bihar Chief Minister Nitish Kumar-i opposition teloktep nungja "INDIA" maginü liasü aser JD(U) den teloktep- RJD Tir, Lalu Prasad Yadav lenmang balaka nung

jajar, ta ashi. Chouhan-i, Modi anema nokdaker opposition lenirtemi pa nungtugu akümba atema shisabulur, ibayongji parnok longjemogo, ta ashi.

"Pai (Modi) maneni takok ngura parnok (INDIA lenirtem) ochimashi jungkai adoktsütsü, ta parnoki meteta dang lir," ta Chouhan-i ashi.

Hokolbarnü Congress general secretary, Priyanka Gandhi Vadra-i Madhya Pradesh semdangba dak sendakba nung Chouhan-i, 2003 küm tashi nung state nung gari lenmangtem aser electricity jenjang kanga mejungi aliba nüburtemi meteta dang lir, ta ashi.

Congress-i yimsüsüba mapang nung parnoki nangzüka aliba ama meinyak-aluyimertem dang loan sentsüh matok aser mapa mangurtem nem allowance magütsü, ta pai ashi.

BJP yimsüsüba kübok Madhya Pradesh kanga tejakleni ogo, kechiyong state nung tamalen per capita income sen 11,000 aliba nungi tangbo sen lakh 1.40 kümogo, ta pai ashi.

Taküm küm tatembanglen Madhya Pradesh nung assembly elections agitsü.



Gwalior, July 21, 2023: Hokolbarnü Congress General secretary, Priyanka Gandhi Vadra-i Gwalior nung Rani Laxmibai indang Memorial semdanga asür nem akhüm agütsüba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 22, 2023

Manipur akhüm samadagi!

Tamalen iba osangkaket yimobilem nunga Manipur nungur ajungba indang kanga tenüng sangasa züluogo, kechiyong Manipur nungertemi kanga junga inyakba mapa aika lir. Aji oda, chiyongtsüa Manipur nungertemi soruchiokbasa tajungba, gari aniba aser yangluba nunga Manipur nungersa tajungba, süa parnoki tajungba arür, saisapong nunga Manipur nungertemibo alimai meteta asayar, kaketshiba nunga asenok dang ongko (Maths) sayurtembo Manipur nungertemang liasü. Ano, iba osangkaket yimobilem nung aiben Manipur nungertem tenüngsanga lemsatepba kaji, Manipur nung telongpur telok aika liaka, Manipur lima, talisa Meite nungur aliba Imphal aser temeket lenden lima nung terenlok mapa inyakbaji asenok Nagaland denbo medemdangtsüla masü, Imhal yimti aser temeketbo New Delhi den toktepa renlokba mapatem indang liasü. Asenok rongnung Imphal kodanga mengudangertemibo Imphal yimti wangshiba ngua süngmangtsü, kechiyong asenoki Kohima ajanga ir aliba yimti ka Kohima dang nungibo terben agia tajungba aser tuluba yangerteta akatsübaji meimlar. Aji oda, state anguba apibo parnokang asen lima nung aruagi azüngtsü melen asenokang Manipur nung azüngtsüsa par lima nungbo Medical college nungi sports university tashi lapoka lir. Tanüa asen lima nung computer amshia mapa inyakertem rongnung Manipur nungur aika ajurutsü. Iba amaji mapa aika nung kanga junga aser nendaka inyaktetba nungtugu Manipur lima aser Manipur nungertem, tanübo tapayutsüka akhüm mali kümdagi. Alima nung kin o kin na tsüngda aser telok o telok na raratepbaji alima yimya dang, ajisüaka tang Manipur nung alir Meite nungur o Kuki nungur na tsüngda meputep adoka tsükchitepba lendong nung atalokba mapatem aika asenoki akhümstüba bilemba Manipur nungertemi inyak memesük inyakbaji temulung ashitsüka, noksa karbo kobaiang mereprang aser otsü aika kobaing manga atalokba angur aser angashir. Item noksa angudang aser osang angashidang, joko Manipur hotel nunga chia mechiyongnü kümogo aser Manipur nungurbo ajak taochi aser temeim maliba nisung amai dang bilema aiter. Ashiko, iba amaji Manipur nungur dak mesaklok akümbaji asenok ama par kidangertem dang masü saka alima nung alir ajaki bilema alitsüa akok. Tang Manipur nung atalokba mapatem yabo aonung pongmang nunga mepongbangsemba mapatem angur. Shibai tang Manipur ama tashitemetet lima nung nisung kolak tangzuka amer senzütsüa ta bilemstü ? Shibaibo Manipur ama tangatetter alidak, kümsa küm külemi lia aruba kiyong-kidangertem meyong kiojen aser tenla kitem dena rongdoktsütsü ta bilemstü ? Shibaibo Manipur ama alimai metetba nübortemi tetsürtem süoshi dena semzükja mangsa kümstür yimdong sema meiner jajatsüa ta bilemstü ? Shibaibo Manipur nungertemi tsürabur kasetta toktsür jala dak tashiyim agi mapa tamajung inyakja ta bilemstü ? Itemji tamamangtsü saka shitak atalokba mapatem lir. Item mapa nungji takok lir asü ? Tetsür mangsa kümstür tashiyim mapa inyakba nungji konang nüngsang angutsüsa teburchi mapa ali asü ? Pei nisung agi lokti kümer pei kidang kiyonger kidang mi sena aobaji nokinketer mapa asü ? Itemji tesüngmangtsüka saka ano item dang nungi tesüngmangtsü taketbaji, Manipur government kübok aliba police-tem meyong prangpong aser injang ajak 'public' nem makzua bener odaktsür Manipur nungur o Manipur nung na khatepdaktsübaji lir. Atangji, Manipur nung atalokba mapatem ajak ya tesüngmangtsü saka ano tesüngmangtsütem rongnung tesüngmangtsü kaji, Center nung BJP government-i Manipur lima dangbo Manipur nung BJP government temeimba meimba ya ka asütsü. Ibaibo temeim masü saka Manipur lima akhüm aser telongjem raksatsür asütsü.

OLEMSABANG

Ao oshi koda tobur tajung

N. Imtatsüng Imchen, Associate Pastor, DABA

O Tenzük :

Nisung meimchir ajak asoshi oshi ya kanga tongtipang aser ibai meteni alitsü makok, putu-sa putu meimchir soyapokya liyonga aruba otsü-olem tarensenji kodang reprangdanglir oshi tejangja dak amenloker aser rangloker otsüji yanglua lir. Sürabangla nisung rongnung tejembitsü oshi makara kosa süla ta temulungjang nung tasüngdangba tulu ? Lipok tapu ka nung Tsüngremi alima yangludang Pai o jembia alima nung akaba ajak poktetdaktsüba indang asenoki Temeshi Laishiba nung angur. Kodang asenoki jembiba oshi ya bilemdangdir iba ya tesüngmangtsü ka lir aser iba o/oshi ya medeni alima nung alitsü koda takoksa tulu.

Oshi jagi par, lar, tia taküm jenjang sayuteter aser kechi kin, nübur ta libaliru tejangja nguteter, anungji oshi ajanga tajung-majung jenti nisung rongnung adokdaktsür. Oshi ya khenyongi tashi tulu aketba akümlir shilem, ibayongji Lipok 11 'Babel Lungki' yangludang Kibuba Tsüngremi meimchir rongnung oshi benjatsü kechiaser iba lungki yangluba ya Kibubai mulungba sentong masü liasü, aser item nüburttem alima ajak len prokshidaktsü kechiyong iba lungki yanglubaji Tsüngremer sentong masü. Oshi ya ajak dang tongtipangtiba aser iba oshi ya tejangja memetetra nisung taküm kaji amajok aser khenyongi kecha jenjang makatsü südi. Putu ajak nung akümlir jenjang balala kodang shisadangdir item tatalokbatem ajakji oshi dak ajemdaker atalok ta kuli angur.

Jenjang Maka :

Ao kin-i pei oshi jenjang makai kümdaktsüba tanü asenok rongnung jangja-jangja meteter, English nungur oshi aser tangar oshi ang keta sen-a jembibaji kanga konang küma tetushi tulu agüjaa jembiteper, saka pei oshi mejembitetba aser mashibabo kecha shishia mali oda züba-zübar. Kenü anogo tebu tajung kati küdang yamai ashi 'ozü chir parnok tanur-ang sürnung Ao oshi mejembi English ang kanga junga jembir ta konang küma ashi' kü mulungjang nung iba nisungjia kechiba iba ama o jembir ta bilem. Mobile nung pei nübur tsüngda osangtsüsang yoktepdang English oshi agi timba ka züluteper aser aji konang amai inyakteper. Pei oshi junga memetetbaji sowar aser tangari shisa maka ta ashitsü. Jung-ang tejung, aginüang taginü, tanü asen kin pei ayak aser sentsüwangshi samaogo aser tang tashi jenjang kecha makabaji 'Ao kin oshi' ya lir, pei oshi memetetba tetetzü pa/la kechi kin-ar aser kechi nübur aji mejangjaba temaitsü sayur. Pei oshi senzuka toktsüba tetezü 'kü taküm kecha maka nemzü-nempongertem aser talidak junga makaba nüburttem ta kuli sayuba temaitsü lir.' Anungji akümlir piyong kecha jenjang makai tangar dak metaloker aliba nübur ta libaliru jembishinü jagi sayur. Tanü temulung shirangtsüka Aotsür Aor kibongtem nung pei oshi mejembi samadaktsür.

Taküm Jenjang :

Tangari jembiba oshi tajung metetbaji kanga dang nungdak aser metettsü tim lir, saka pei tetsü oshi senzuka toktsür tangar oshi ang tongtipangba kümdaktsübaji taküm jenjang raksar aser ya maksü tulu lir. Aseni tangar oshi metetba amaji asenokia pei oshi tajungji tangar dang sayua angazükdaktsüsüla. Asenok den apetba aser pei dak alang iba oshi tajung moatsü saka kechiba teyanglur Kiburi moatsüba jenjang raksatsü. Tang tashi asenok tangar yimsüsüba ozüng kübok ali amai parnok oshiji kanga keta-sena konang küma jembir. Kaket reju nung azüng tashibo tangar oshiji tongtipang kechiyong tazüngtsü kakat timbaka English mesüra tanga oshi agi zülua lir. Kodang nungdaler iba mapang tangar oshiji meteta alitsü tajung, saka kechiba aser yimkong nung tangar oshi kibur kümdaktsür toktepa jembiteper. Shibai Pei oshi sentoker la/pa libaliru taküm jenjang raksar aser ochi mashi tangar memenepeba kuli sayur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerer angateta agitsü mepishir

Mumbai nung Khristantemi leper ken o nung takok angu



Mumbai nung aliba Khristan leper ka noksa nung angur.

July 21, 2023: Mumbai nung temaba court-i sorkar ketdangsertem dang Khristantem atema lemezüksüba leper kimong tanga nungdak atema mamshitsüla, ta tuyuogo.

July 19, 2023 nü Bombay High Court-i Thane Municipal Corporation (TMC) dang, leper atema lemezüksüba kimong nung yimti terenlok mapa balala kecha meinyaktsüla, ta tuyu.

Mumbai nung Khristan telok kati court nem temepishiba ken o ka agüja liasü aser ken o agütsürtem rongnung Melwyn Fernandes-i, "Yimti nung alir Khristantem atema iba ya takok tuluka lir,"

ta ashi.

July 21 nü osangbener den jembidang Fernandes-i, "Kisürtem aser yimtenren lenirtem den tesendaktep junga alirtemi leperitem kimong atsünga agiba ajanga tasümgang aremstü atema Khristantemi timtem kanga ajurua liasü," ta metetdaksü.

Fernandes-i, "Right to Information Act kübok ni application ka agüja Khristantem atema lemezüksüba leper osang metettsü atema sorkar dang nungi telangzüba meshia liasü," ta ashi.

Yamaji Municipal-i leper atema lemezüksüba kimong ter

metetdaksü, ajisüaka ozümgang alema tangartemi item kimong rakzüka alibayong ketdangsertemi Khristantem nem leper agütsütsü memelung, ibayongji onoki high court nung temepishiba ken o benoktsüsa aküm, ta Fernandes-i ashi.

Ken o ajak angadanga sülen tatesa Chief Justice Nitin Jamdar aser Justice Arif S Doctor nati, "Onoki telangzübatem jagi melung masür. Terenlok plan nung tasümgang aremstüba atema kodang kimong lemezüksüdir ibaji tasümgang aremstü atema dang amshitsüla; tanga nungdak atema amshitsü makok," ta oshidang agütsü.

MP nung pastor ka den Khristan ana jail nung puoktsü

July 21, 2023: Madhya Pradesh state nung court kati pastor ka densema Khristan asem küm aika tepuokdak ayutsü obendang agütsüogo; iba dak alia court-isa parnok asem shia dang senchi meyrjang tenemnem (50,000) achi.

Pastor den Khristan ana jagi state nung anti-conversion ozümgang anema inyakogo, ta aitsü.

Pastor Jam Singh den Khristan ana- Ann Singh aser Mangu Singh nungeri state nung lisopurtem Khristan yimsü dangi meyipdaksür, ta court-i aitsü.

Ajisüaka district court-i parnok nem bail agütsüba den külemi iba court obendang anema state High Court nung temepishiba ken o benoktsü atema parnok nem ita ka mapang agütsü.

Ita ka tashi nungji Khristantem jagi state high court nung ken o magütsüra parnok aputsü aser jail nung puoktsü. Par asemprongla ya Protest Shalom Arogo nungi lir.

Protestant Shalom Church nung tongti putir, Paul Muniya'er jabaso, Kaleb Muniya-i, "Kobi melii onoki iba obendang anema high court nung ken o benoktsü," ta metetdaksü.

July 20 nü osangbener den jembidang Muniya-i, "Tang aija alirtem jagi nisung shinga

yimsü memeyipdaksüi lira parnok anema benoka aliba ken o agientsü," ta ashi.

Nisung ka tenümgang agi, H. Baria-i, "2021 küm December 26 nü pastor-i kü den tetsür ka sarasadem sentong ka nung adentsü atema Jhabua district kübok Bisouli yimdaki jaoka liasü. Iba mapang nungji pastor-i onok dak tzi rüklöksü aser Khristan akümstü asümganga liasü," ta metetdaksüba nung ajemdaker pastor anema ken o benoka liasü.

Lisopur nütsümgang aika aliba district nung ayongzükbanga sentong nungji pastor-i parnok dang, nenoki Khristan yimsü agizükra nenok nem angati shisaliok aser angati medical treatment agütsütsü ta nangzükbanga, ajisüaka lisopurtemi memelungi iba tesemji toktsür ao, ta pai police nem metetdaksüba liasü.

Arogo nung tongi putir, Muniya-i ashiba agi, pastor den tangar Khristan anaji kinümgangertem dang lir; coronavirus wara mapang nung Tenla ki lapoktsü memelaba agi parnok kidang dang sarasadema liasü, ta ashi.

Paisa, Khristantem anema ken o benoktsümgang yimdak nungi kilometer 8 shi pilar tanga yim ka nung alir, ajisüaka anti conversion ozümgang kübok pai tiyazü nung tai tonglöktsü, ta ashi.

June 19, 2023 nü Jabalpur nung Madhya Pradesh High Court bench kati, Khristan yimsü kangshia agizükertemi ken o agütsüba mesüra anti-conversion ozümgang kübok Khristantem anema ken o mebenoktsüla, ta metetdaksüba liasü.

"Yimsü tasen agizükertem kati agütsüba ken o ka mesüra Police officer-i anti-conversion ozümgang kübok ken o mebenoktsüla," ta bench-i metetdaksüba liasü.

High court-i Jabalpur nung tongti putir, Gerald Almeida aser nun ka nem bail agütsüba mapang nung, third party kati (yimsü tasen agizükertem) agütsüba ken o mesüra anti conversion ozümgang kübok ken o magizüksüla, ta obendang agüja liasü.

Madhya Pradesh state yimtiba, Bhopal nung Khristan lenir, Daniel John-i, "Police-i ozümgang shidak benokra Madhya Pradesh nung anti conversion ken otem malitsü," ta ashi.

July 20 nü osangbener den jembidang Daniel John-i, state nung Khristan nütsümgang kanga ajema lir, anungji parnok tangar yimsü meyipdaksüba nung shilem magütsü, ta ashi.

Nütsümgang million 72 aliba Madhya Pradesh nung Khristan nütsümgang nütsümgang shilem I dang nungi tajemba lir. State nung nütsümgang shilem 80 bo Hindu nungertem lir.

ANOGO ABEN TSÜNGREM DEN

Tatala Aremzükbanga

T. Ken 119: 17 - 24.

Nisungtemi na ataladang nai kechi inyaktsü? Temem mesayuteter telok nung na alidang, talisa Tsümgangrem O nung mamangertem telok nung na alidang, parnok o temji ne koloki air idangji nai kechi inyaktsü? Ken züluri telangzüba ka agütsür: "Ano tongtipuri ni anema tasa asaa menaka, ne tenzükeri ne telatet ozümgang indang shisadangtsü. Ne kulitem ano kü tepela aser kü teshisadangertem lir" (t.23,24).

Tsümgangrem O nung shisadangang. Tsümgangremi kechi ashir aji ne kolok nung yuang. Tangari ashiba mapatem indang asenoki bilemra aser shisadanga, asenok meinprongtsü aser jashitsü. Saka asenoki Tsümgangremi ashiba ochi aser shidak aser temeshi aser tobur tajung mapatem nung shisadanga, Pa tesümgang agi asenok süneptsütsü; asen mulung sünga alitsü.

Tsümgangrem O nung pelaa liang. "Ne kulitem ano kü tepela aser kü teshisadangertem lir" (t.24). Kari miim o jembiba nung jangra atemer. Parnoki tangar olulu jembiba nung jangra atemer. Saka ken züluri ashir, "Parnoki miim o jembiba alidang aser tiyazü jembiba alidang, ni Tsümgangrem O shisadanga liasü, kechiaser ni iba nung pelar."

Tsümgangrem O ji tashi angang. "Ne kulitem ano kü tepela aser kü teshisadangertem lir" (t.24). Iba tetezü, "kü dang tsümgang o ashir." Tashi menden nung alirtemia, tembartem aser tsükchirtemia na aginütsü. Saka Tsümgangrem O nungi nai tsümgang o agiang.

Tanü kechi timtemsa lidir liang, Laishiba dangi meyipang aser iba jagi na tsümgangidakang. Iba yagi ne kolok, temulungjang aser temulungtetba yimsadakang.

Chinese Communist Party-i Laishiba nung tekong kar melenshir

July 21, 2023: China nung Vatican-i atsü-anema CCP den Chinese Communist Party

(CCP) sorkari linük nung Osang angazükba agi, tamangba yimsü azüoktsü CCP-i Tibet nung yimsü nükjidong nung Laishiba nung lenir Dalai Lama melentsü tekong kar melenshidar, ta U.S. sentong lir.

Representative, Mike Gallagher-isa CCP-i Gallagher (R-WI)-i Laishiba nung tesem kar zülushiba metetdaksü.

CCP atema jembitsü asoshi Mezümgangbuba nung, ayongzükbanga House Select osangtajung Yohan kakat nung Committee senden nung Yisu-i nüktapangta tsür ka jembidang Gallagher-i, CCP dang, "Oang aser tang nungi Chairman, Xi Jinping-i temenen tebenshi' ta shia lir, Khristantem nem Tsümgangrem ajisüaka 2020 küm Chinese masü saka party ang university nung kakat ka tenzükdaksüner, ta ashi. nungbo iba Lai tekongji

2017 küm Party Congress melenshia "Yisui nüktapangta nung Xi Jinping-i China nung tsürlaji lung agi onsetsa tamangba yimsü azüoktsü aser südaksü," ta shia lir, ta Rep. Gallagher-i metetdaksü.

liromedemtsü atema Tanabuba nung, Henan sangdonga liasü. province nung CCP

ketdangsertemi Protestant tesayuba azüoktsü merangba Arogotem dang Ozümgang Ter dang masü saka Buddhist aser melen Xi Jinping-i jembiba otem Muslim nung minorities amshitsü tuyu. Mezümgangbuba anema-a inyaker, ta Gallagher- ozümgang nung "Kü dak alia tanga tsümgangertem malitsüla" (Anitet i metetdaksü.)

China nung yimsü madak CCP-i tashi tulu amshir. China nung Raman Catholic lenirtem melen-a "Anüolen aliba linüktem tangatetba mita shimtsü atema 2018 küm alitsüla," ta amshir.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Repten

(v) Süngolio repzüka benden (pluck and collect leaves)
* Nashi metsürtemi rem aser süngolio reptena chidaktsür.

Reptep

(adv) ana külemi alen mesüra aben
(tie double or double clothing)
* Süng ana reptepa alenba agi yipden kümer sü ana reptepa abener mejang.

OLONG PAITEP # 6583

| | | | | | | | | | |
|----|----|----|--|----|--|----|--|----|----|
| 1 | 2 | | | | | 3 | | | 4 |
| | | | | | | 5 | | | |
| 6 | | | | 7 | | | | | |
| | | | | | | | | 8 | |
| 9 | | 10 | | | | 11 | | | |
| | | | | 12 | | | | | |
| 13 | | | | | | | | 14 | 15 |
| | | | | | | | | | |
| | 16 | | | | | | | 17 | |
| 18 | | | | | | | | | |
| | | | | 19 | | | | | |

TIPILEN

- 1. Pongentsür dang ajaba- (7)
- 5. An-i akoba - (5)
- 6. Ta _ _ _ gka - (3)
- 9. Pei indang aküm - (3)
- 11. Tzü nung alir - (5)
- 12. Talangba aküm - (3)
- 13. Yangluzükli - (5)
- 14. Ozü ka - (3)
- 17. Songtem - (3)
- 18. Ken yimya - (5)
- 19. Kumtetsakba - (7)

LANGTSÜNGLEN

- 2. Teimla ayu - (5)
- 3. Ajir / Penzür - (9)
- 4. O jembiba yimya - (3)
- 7. Tali anguba - (9)
- 8. Lokti tentet - (4)
- 10. Itsük tzü - (4)
- 15. Apitet - (5)
- 16. Shishilembatsü atema amshiba - (3)

OLONG PAITEP # 6582 TELANGZÜBA


TIPILEN :

- 1. Pakti, 6. Teme, 7. Suyim,
- 8. Sadem, 10. Anüngdang,
- 16. Tanga, 17. Nüji, 18. Kanga.

LANGTSÜNGLEN :


- 2. Auso, 3. Tiyazü, 4. Benden,
- 5. Lepma, 9. Agi, 11. Nüngja,
- 12. Ajunga, 13. Alang, 15. Tang.

NAI-A YA METETTER MA



Nükuptsü taka ajatsü akokba tenük puadaktsüba noksa ka idagi angur. Idagi noksa nung anguba ya lisü ana lungdena ayuba dang mesüker saka iba ya circle ana lir aser kanga dang telunglong. Kanga junga purapitetogo ni!

Noksa nung meputepi aliba 8 bushiang




PAMRA-i Meitei nunger dang Mizoram toktsür aotsü ayongzüker

Aizawl, July 21, 2023

(Agencies): Mizoram nung taoba mapang telungpur telok asüba Peace Accord MNF Returnees' Association (PAMRA)-i Mizoram nung jenoka aliba Meitei nunger ajak aotsü metetdaksüogo.

"Meitei nunger lendong nungi jenbutzü atema Mizoram toktsür aotsü mepishir. Parnok dak langka tamajung kar atalokra iba tebilemsü khuretji parnok dang abentsü" ta PAMRA-i ashi.



Manipur nung Zo nunger dak tashiyim mapa inyakba alimai meteta lir ta PAMRA-isa ashi.

Meitei nunger Manipur nung

Zo nunger dak tashiyim mapa inyakba ya Mizo nungeri mepelar ta parnokisa ashi.

Mizo National Front (MNF)-i nüjiso atema rarayonga aruba sülen 1986 küm Peace Accord nung sign sütepba sülen Peace Accord MNF Returnees' Association (PAMRA) ya tentet.

July 19, 2023 nü Manipur nung Kuki tsür ana mangsa anir senzüba aser tim masüba mapa inyakba video ka prokshiba sülen PAMRA-i iba osang metetdaksü.

Assam nung Raijor Dal-i delimitation anema lungkak ait

Guwahati, July 21, 2023

(Agencies): Hokolbarnü Assam nung opposition Raijor Dal (RD) züngsemtemi delimitation maparen anema lungkak aيتدang police-i parnok aika apu.

ECI indang full bench kati draft proposal atema tebilembatem angadanger aser tanü RD tanishir aser Sivsagar MLA Akhil Gogoi-i anir züngsemtem ECI nem tezüluba ka agütsüi aodang RD züngsem kari ola adoka ayimten.

Dharjya Konwar aser Pranab Deka nati anir delimitation maparen anema yimyim ayim.

Idangji security nisungtemi parnok lungkak maitdaksüi noktandang parnok lenmang noktangtsü merang.

Iba mapang RD züngsemtemi security

nisungtem den toktep aser iba jagi parnok apu.

Election Commission of India (ECI) indang full bench ka Bodbarnü Assam nung arua lir aser parnok draft delimitation proposals atema public hearings agir.

Srimanta Sankardeva Kalakshetra complex nung Chief Election Commissioner Rajiv Kumar aser Election Commissioner Anup Chandra Pandey o Arun Goel nungertemi anogo asemnü public hearing agir.

ECI-i June 20 nü Assam nung assembly menden 126 aser Lok Sabha constituency 14 indang draft delimitation document sayaa liasü. Assam nung Rajya Sabha menden 7 lir.

Draft delimitation document ajanga Assam nung Scheduled Castes atema assembly menden 8 aliba nungi 9 aser

Scheduled Tribes atema menden 16 aliba nungi 19 kümja lir.

Parliamentary constituency atema ST category kübok menden 2 aser SC category atema menden 1 ta ECI-i shidanga lir.

ECI-isa Assembly aser Lok Sabha constituency indang telongtet kar melenshitsu aser menden kar agienba den ano kar tentetsü shidanga lir.

Taküm March 26-28 nung ECI telok kati Assam semdanga political parties, public representatives, civil society members, social organizations aser public lennirtem den ajurutepa delimitation maparen indang jembia liasü.

Iba mapang political party 11 aser tanga telok 71 nungi ECI nem parnok tebilembatem tezüluba nung agüja liasü.

Mizoram nung BJP aser AAP züngsemtem raratep

Aizawl, July 21, 2023

(Agencies): July 21, 2023 nü Mizoram nung Aam Admi Party (AAP) züngsemtemi Bharatiya Janata Party (BJP) office kima nung Manipur tensa atema lungkak aيتدang mepetmesü adoka raratep.

"Manipur nung tensa majungba ya BJP indang tebilemsü khuret lir aser BJP-i aniba Centre sorkari parnok teinyaktsü meinyaker" ta AAP

züngsemtemi lungkak ait.

AAP party züngsemtem BJP office jakdang adenshidang telok anaprong züngsemtem tsüngda mepetmesü adoka raratepdang parnok kar terara yiru.

Ajisüaka, iba mapang police aliba ajanga tensaji azüoktet.

BJP züngsemtemi rara mena ta AAP Mizoram-i ashir. Ajisüaka BJP state President Vanlalhmuaka-i AAP Mizoram

aitsü. "Parnoki state nung aser talisa tanga party office tem jakdang lungkak maittsüla" ta Vanlalhmuaka-i ashi.

Iba tatalokba sülen Mizoram state BJP-i FIR ka benok. "AAP-i Deputy Commissioner (DC) nungi temelaba magii public sentong ayongzüker, temelaba magii PA system amshi aser Raj Bhawan anasa public lenmang ka ghonda aika shibang" ta FIR nung shia lir.



Arunachal Pradesh Youth Congress (APYC) züngsemtemi Rajiv Gandhi Bhawan kima nung Manipur tensa atema lungkak aitba sentong ka agiba angur. Prime Minister Narendra Modi, Union Home Minister Amit Shah aser Manipur Chief Minister N Biren Singh nungeri Manipur nung tetsürtem kümzüka meyetetba atema tejashi sayua APYC züngsemtemi parnok mesüka yanglur rongdok. (Itanagar, July 21)

GOVERNMENT OF NAGALAND
DIRECTORATE OF NEW & RENEWABLE ENERGY
NAGALAND, KOHIMA

BIOGAS PROGRAMME

Applications are invited from Individual/farmers/co-operatives/slaughter house etc for installation of Biogas plant under Biogas Programme of the Ministry of New & Renewable Energy, Golfor the FY 2023 -24 to be implemented by the Department of New & Renewable Energy, Nagaland.

Eligibility Criteria :

- i. Beneficiary should have their own land/space for installation of Biogas Plant.
- ii. Financial capability for construction of Biogas Plant.
- iii. Availability of cow dung/ pig waste /agricultural /vegetable waste / human excreta etc and regular water supply.

Mode of installation :

- i. To be installed by Turnkey workers /Renewable energy technicians.
- ii. MNRE approved Original Equipment Manufacturers (OEMs) and their certified service providers.

Uses : Clean cooking fuel, meeting small thermal and power needs, lighting etc. Slurry can be used as organic enriched Bio-manure for farming and feeds for the fishes.

Central Financial Assistance:

Basing on the capacity of the Plant, Central Financial Assistance as per the table shown below shall be provided to the beneficiary on commissioning of the project through DBT route.

| Sl. No. | Particulars of Central Financial Assistance (CFA) and States / UTs, regions & categories of beneficiaries | Biogas Plants under Biogas Programme ranging from size 1 to 25 Cubic meter biogas per day (In Rs. Per plant) | | | | | |
|---------|-----------------------------------------------------------------------------------------------------------|--------------------------------------------------------------------------------------------------------------|-------------------|-----------------|--------------------|------------------|---------------------|
| | | 1M ³ | 2-4M ³ | 6M ³ | 8-10M ³ | 15M ³ | 20-25M ³ |
| A | CFA Applicable | | | | | | |
| | • Nagaland | 17,000/- | 22,000/- | 29,250/- | 34,500 | 63,250 | 70,400 |
| B | Additional fixed subsidy for: | | | | | | |
| | • Biogas Plant if linked with sanitary toilet. | 1,600 | 1,600 | 1,600 | 1,600 | NA | NA |

For further information, please contact ; **Smt. Neizen Peseyie**
Project Officer
Directorate of New & Renewable Energy
Below Tribal Affairs Directorate
Phezoucha Colony
Nagaland : Kohima-797004
Email : neizen@gmail.com ; Mob : 9436017738

OBOLA IMTIKUMBA JAMIR (MOLUNGYIMSEN)

SEMCHIRTEM TENÜNG NUNG TENÜNGSANG AGÜTSÜR

Rev. Tajung aser Watila Imchen dena jala **MADAMESHILA JAMIR**-i züluba thesis "*Land-slide Susceptibility, Vulnerability and Risk Assessment of Noklak Town, Nagaland*" atema Dept. of Geology nungi Doctor of Philosophy (Ph.d) Degree ngutetba asoshi Semchirtem ajak tenüng nung tepelaba lemsateper.

Tsüngremi ne wadang nung tali moajangma.
Semchirtem tenüng nung
(1) T. Alemba Jamir
(2) T. Lanutoba Jamir
(Dimapur)



Pakistan nung election October ita agitsü renema lir: ECP

Islamabad, Chiteni/July 21 (Agencies): Pakistan nung election ketdangsüa agiba tentet ajanga legislative assembly tem mapang shidak nung anenra October ita election agitsü renema lir ta ashi.

Brehostibarnü Islamabad nung osangbener senden ka nung jembidang Election Commission of Pakistan (ECP) ketdangsür temi ashiba agi, linük indang assembly aser Sindh aser Balochistan provincial assembly tem kum pongu kümsük August 12 nung tembanger dissolve süra, general elections ya October 11 matongdang agitsü.

Pakistan indang constitution nung elected assembly ya kum pongu tenzüksü shia lir. Mapa shidak nung anenba sülen caretaker ka amenoktsü aser parnoki anogo 60 tsüngta elections agitsü.

Taoba mapang ECP ketdangsür Kanwar Dilshad-i ashiba agi, kum pongu metongteti assembly tem dissolve süra election ya anogo 90 tsüngta agitsü ta Pakistan constitution nung shia lir.

"ECP ajanga road map agitsüba nung, national assembly aser ano Sindh aser Balochistan nung provincial assembly tem mapang shidak nung anenra, election ya October 8 aser 11 tsüngta agitsü shia lir. Ajisüaka parnok iba dang tama shibangra, election ya November 8 nungi 11 tsüngta agitsü," ta Dilshad-i ashi.

Ajisüaka election anogo ya Pakistan nung tashi tait mitkar temi lemtetsü, shirnoki linük nung kum 30 dak tema yimsü süa aru, ta osangbener aser yimtenren shisadanger Cyril Almeida-i ashi.

"Tang tashibo elections ya 2023 nung agitsü asü masüar mejangjateter. Aser tetsükdaktsü tem ajangtetba sülenbo 2024 nung agitsüa nungdak madoker," ta pai ashi.

Taoba kum April ita parliament nung no confidence vote agitepba nung taoba ato kilonser Imran Khan-i tamakok ajuruba sülen Pakistan nung

yimtenren tsütsü mepetmesü adoka arur. Pa atsüngdoktsü mitkar temi tasa yanglu, ta Khan-i aitsür.

Taküm January ita Khan'er Pakistan Tehreek-e-Insaf (PTI) teloki Punjab aser Khyber Pakhtunkhwa province indang assembly election nung takok angu, saka pai linük election tekeraba nung agitsü meranga anena liasü.

Pakistan nung akhi mapang nungi national aser regional elections ya atongtepa agia arur.

Taküm April ita Supreme Court ajanga totuyuba agüjaka province ana nungya election magi aser national assembly anentsü asoshi Ato Kilonser Shehbaz Sharif-i kodang totuyuba agitsütsüar mejangja.

Kasa mapang Khan anema ken o ter dak tema benoka lir, aser item rongnung ochimashi mapa inyakba aser kiralongraba densema lir, anungji pa yimtenren nung takum alitsü lenmang tejangja mangur.

Pa May ita khen apu aser iba sülen pa bukuma nisung meyrirjang aika yimtong nung adenshia sorkar aser army indang ki o jen nung tenük yoka liasü.

Longkak aiter ya karbo mangatetep aliba military court nung anir oa ken o jembia liasü.

Khan-i jembiba aser pai osangbener senden nung jembiba mainstream media nungi nokdanga lir aser par indang party lenir ter dak tema mitkar temi merenshi maren party yutsüogo.

Party yutsüba ya Khan aser par party election nung tetsükdaktsü agitsütsü tasa ka lir, ta ashir.

Taruba election ya kanga sadoksayima yimya shidak nungbo magitsü, ta Almeida-i ashi.

"PIT party lokaogo, saka PTI voters tem election nung shilem agitsü-magitsü memetet. PTI nung mezüngshirtem taruba assembly nung dendaktsütsü asoshi mitkartem ajungshitsü. Aser ashikülak mapa inyaka election menentsütsü," ta pai ashi.

Putin-i Wagner tekolakba dak mang ayangtsü akok: CIA chief



Washington, Chiteni/July 21 (Agencies): Russia Tir Vladimir Putin-i Yevgeny Prigozhin dak mera kar agitsü atema mapang atsülangtsü meranger, ta CIA tekolakbai ashi.

Prigozhin ya Wagner mercenary group tekolakba lir aser ita ka tejangdang pai anir Russia nung mitkar lenirtem anema nokdaka liasü.

Mitkar lenirtem anema nokdakba ajanga Putin yimli nung tashi maitba temai adoka sayur, ta CIA tekolakba William Burns-i ashi.

Pai Aspen Security Forum dang ashiba agi, Russia leniri Prigozhin dak mang ayangtsü lenmang bushitsü akok.

"Asenoki tsüngsang kanga tepenja ka angur," ta CIA tekolakbai Brehostibarnü ashi.

Tawa video ka nung Wagner tekolakba Belarus nung aliba indang asüngdangba mapang, Prigozhin ya tesem balakai ao saka tawa Belarus yimtiba Minsk aser Russia nung liasü, ta pai langzü.

Wagner telok tekolakba den tajungtiba nung mera agitsü asoshi lenmang bushiba mapang Putin-i mapang

Sergei Surovikin, shibai Wagner mutiny jelia meteta liasü ta ashi, pa tangbo "freedom of movement" mali, ta CIA tekolakbai ashi.

Putin-i Russia nung kum 23 yimsü süa arudang iba mutiny ya pa asoshi khuret tulutiba liasü, aser Kremlin-i Ukraine indang jembiba nunga o memetemer, kechiaser iba rara nung tiazü kanga jembir ta Prigozhin-i shia liasü, ta Burns-i ashi.

Prigozhin dang "Putin's chef" ta ajar, kechiaser pai Wagner telok metentetdang Putin aser mitkartem asoshi chiyongtsü anepaluja liasü.

Putin-i pasasa pa ya Russia nung shingai kecha meshitetba lenir ka ama alir, anungji ghonda 36 tashi mitkar lenir anema longkak aitiba yagi linük nung aikat molungjang nung tasüngdangba arur, ta Burns-i ashi.

Tongpang nung Ukraine-i maneni takok ngura, Prigozhin-i iba rara nung tenüng asenba nung Russia nung temolung agitsütsü, ta pai ashi.

Ukraine-i meyiper raraba nung bilemba ama takok mongutetba nung tesüngmangtsü kangabo mali, kechiaser nokdangtsü dang nungi meyiper raratsü tasakba aser Russia nungertem ita aika jelia nungi renemshia aru, ta CIA tekolakbai ashi.

"Mapang agitsü aser terenlok alitsü temela masütsü. Ajisüaka ni teimla aliba nisung ka lir," ta Burns-i ashi.

Russia-i Black Sea nung rong tem amaktsü aser iba atema Ukraine nung tenüng asentsü ama ni ajitetet, ta paisa ashi.

alizüker amai lir, ta Burns-i ashi.

Russia lenirtem asoshi Africa, Libya aser Syria amala nung iba sen yong raraba telok ya jenjang keta lir, anungji Putin-i iba telok ya par lenirtem nungi piladaktsütsü merangtsü.

Aser shidakba mangyangtsü asoshi Putin-i atatsü akok, ta CIA tekolakbai ashi.

"Mangyangba ya temokong agitsüba chiyongtsü tajung ka lir ta Putin-i bilemer. Ni ajangshiba nung Putin dak meyipa agitsüba tangatetba lir, anungji Prigozhin jenbura ni süngmangtsü," ta Burns-i ashi.

Wagner tekolakba nem miim chidaktsütsü akok, ta US Tir Joe Biden-i ita tetenzüklen shia liasü.

"Ni pa asünungbo ni kanga kumdanga achi-ajemtsü. Kü indang chiyongtsü nung ni tenük yoktsü," ta US tiri ashi.

CIA director-ia "Ni Prigozhin asübo kü indang chiyongtsü tendanger mapa nungi manentsüla," ta ashi.

Mitkar lenirtem anema longkak aittsüba ya intelligence agency temia jelia yongi memeteti liasü, ta Burns-i nenshia ashi. Russian army general

Keviliekho Zumvü-i 19 buba Nagaland Chess Championship akok



Kohima, Chiteni/July 21 (TYO): Nagaland Chess Association ajanga Kohima nung aliba NOA Complex nung ayongzükba 19 buba Nagaland Chess Championship tetoktepba Keviliekho Zumvü-i akok.

Iba asayamung nung state kübok tesem balala nungi asayar 48 arua shilem agia liasü, koba category asem - Open, Under 18 aser Under 14 nung July 16 nü nungi toktepba liasü.

Open Category nung Zumvü-i points 8 nguteta temaba jenjang ngutet aser Salhoutu Nyekha, Sede Nagi aser Seyiekhrietuo Mere nungeri mezüing, tanabuba aser tasembuba jenjang ngutet.

Par pezü ya Nagaland State tenüing nung National Chess Championship nung shilem agitsü, koba taruba ita Pune, Maharashtra nung agitsü lir.

Under 18 category nung Model Higher Secondary School Kohima nungi Shenikali Hesso (tetsür) tematiba jenjang angu, aser Pulonito Hesso, Jesse P. Chishi & Viboka Awomi nunger temi tanabuba, tasembuba aser pezübuba jenjang ngutet.

Under 14 category nung Touch of Hope School Chumoukedima nungi Jitihto Nyekha-i mezüingbuba jenjang, Arho Rupreo, Neipedezo Metha, Thejasezo Metha aser

Mereh Doulo nungeri tanabuba, tasembuba, pezübuba aser pongububa jenjang nguteta liasü.

Individual awards nung Best Female Participant sempet Tsesam-i angu, Domian Lyngdoh-i Youngest Player aser K. Sekhamo-i Oldest Player sempet ngua liasü.

Iba championship indang chief arbiter aser NCA indang Honorary Secretary ase5r All India Chess Federation indang Joint Secretary Mughaho Awomi-i takok angurtem tenüing sangdonga liasü.

NCA vice president P. Khezhie-i melepzüing o jembia liasü.

FIFA rankings: India football team 99bubai tuogo

New Delhi, Chiteni/July 21 (Agencies): India tebur football team-i Brehostibarnü alizüing tasen ka tongteta 2018 küm sülen tang mezüingbuba FIFA ranking nung sub-100-i iogo.

SAFF Championship akokba sülen iba hopta sayaba FIFA ranking nung India team jenjang ka tejakdangi tua tang 99buba nung lir.

Iba ita tetenzüklen Bengaluru nung SAFF Championships asayaba mapang India team-i kanga junga asaya semifinal aser final nung penalty metsütepba sülen Lebanon aser Kuwait amala tashitait team kokogo.

Takok tajung anguba sülen Lebanon team-a jenjang ana tejakdangi tua tang 100buba

nung lir aser Kuwait-a jenjang 137 tejakdangi tua tang 137buba nung lir. SAFF Championships toktepba asayatsü nükjidong nung Lebanon aser Kuwait na ya jaoka liasü.

FIFA ranking nung India team-i 1996 küm jenjang 94buba tongteter lir koba tang tashi nung jenjang tajungtuba asütsü. Linük team-i 1993 küm 99, 2017 aser 2018 küm 96 tongtetogo.

Ranking nung world champions Argentina maneni temaba jenjang nung lir aser parnok sülen France, Brazil, England aser Belgium lir.

Asia linüktem rongnung nung Japan team (20) ajak dang temaba jenjang nung lir aser parnok sülen Iran (22), Australia (27), Korea (28) aser Saudi Arabia (54) ta lir.

Abu Metha-i Athletics Federation of India ketdangsürtem ajuru



Dimapur, Chiteni/July 21 (TYO): Advisor to Chief Minister, Investment & Development Authority of Nagaland indang Chairman aser Athletics Federation of India (AFI) indang Vice President, Abu Metha-i July 21, 2023 nü New Delhi nung Athletics Federation of India indang Planning Committee Chairman, Dr. Lalit K. Bhanod den senden mena liasü.

Tawa Thailand nung Asian Athletics Championships agiba nung Indian Athletics Team-i medal 27 ngutetba asoshi Metha-i iba senden nung tenüingsang agüja liasü.

Asian Athletics Association Awards Ceremony nung AFI nem Best Performing Federation konang agüja liasü.

Iba senden nung Metha den taoba mapang Long Jump nung champion Anju Bobby George aser Chief National Coach, Radhakrishnan dena liasü. Anju Bobby George ya AFI nung Vice President lir.

Iba senden nung northeast region aser talisa Nagalan nung athletics aser track and field temaba jenjangi ajungkettsü asoshi lenmang balala nung rangloker jembia liasü.

Region ajangzüksü asoshi Nagaland nung AFI kübok

coaches aser technical ketdangsür nem top-level education program tenzüksü indang jembia liasü.

Maneni sempet aliba saisaponger atema national aser international coaches temi yaria special coaching camp alitsü indanga jembia.

Taoba mapang Nagaland-i northeastern states nungi technical officials tem atema capacity-building workshop ka Kohima nung ayongzüka liasü.

Iba training nung AFI certification course tema agirtem nem National Games aser Khelo India Games densema national-level tetoktepba balala nung ketdangsütsü maongka agütsü.

Taoba mapang AFI kübok Nagaland nung South Asian Cross Country Championships takok ngua agia liasü.

Nagaland Athletics ajanga AFI den lungjemer athletics aser track and field nung saisaponger lanurtem anitettsü asoshi meranga inyaker.

President Adille Sumariwala aser Planning Chairman Dr. Bhanod nungeri anir AFI ajanga northeast region nung tanen makai yaria temolung agütsüba atema Metha-i pelaba lemsatapa liasü.

U-14 Catch Them Young Tournament (Taekwondo) nung Wokha-i tematiba jenjang angu



Dimapur, Chiteni/July 21 (TYO): State Level 14 buba Under 14 Catch Them Young Tournament (Taekwondo) championship nung Wokha district-i tematiba jenjang nguteta liasü, koba Indira Gandhi Stadium (IGS) Kohima nung Department of Youth Resources & Sports ajanga ayongzüka July 21, 2023 nü tembangogo.

Wokha-i iba asayamung nung Gold medal pezü aser Bronze ka angu, Chümoukedima-i Gold asem aser Silver ka nguteta runners-up jenjang tongtet. Iba asayamung nung Zunheboto district dak alaka tanükba district 15 nungi shilem agia liasü, koba Brehostibarnü tenzüik.

Iba asayamung tembang sentong nung tesemdangertongti ka ama arua adendang Development Commissioner and Principal Secretary Law

and Justice, R Ramakrishnan-i lanurtem asaya nung yaria anitetba atema Department nem tenüingsang agüja liasü.

Ano tsürabor temi pei tanurtem saisapong nung shilem agidaktsüba asoshia pai tenüingsang agütsü.

Asenok ajak lungjemer inyakba ajanga Nagaland nungi asayar temi tarutsü anogotem

national aser international medal tem angutsü, ta pai imlaba lemsatapa liasü.

Iba sentong nung menden YRS Director, Kethosituo Sekhose liasü, Additional Director, Megolhou Dolie-i melepzüing o jembia aser City Church, Kohima indang pastor Zajamo Odyuo-i tenüingsang agüja sarasadem.

| FINAL MEDALS TALLY | | | | | |
|--------------------|--------------|------|--------|--------|-------|
| Sl. No | District | Gold | Silver | Bronze | Total |
| 1 | Wokha | 4 | | 1 | 5 |
| 2 | Chumoukedima | 3 | 1 | | 4 |
| 3 | Phek | 2 | 1 | 2 | 5 |
| 4 | Dimapur | | 2 | 3 | 5 |
| 5 | Kohima | | 1 | 4 | 5 |
| 6 | Shamator | 1 | 1 | 1 | 3 |
| 7 | Peren | | 4 | | 4 |
| 8 | Kiphire | | | 2 | 2 |
| 9 | Noklak | | | 1 | 1 |
| 10 | Mokokchung | | | 2 | 2 |
| 11 | Niuland | | | 3 | 3 |
| 12 | Tuensang | | | 1 | 1 |
| 13 | Mon | | | 1 | 1 |
| 14 | Longleng | | | | 0 |
| 15 | Tseminyu | | | | 0 |

BILEMDANGANG
 "Asenok ajak dak tashi lir, saka tepilaji aseni amshiba nung keta lir."